

Lu mwê sint.

(Gaston Lucy -Les Echos de la Cité 17 Juillet 1969.)

Lès vîs du L'Forèt racontint dins l'timps k'i gn'avot, là bin longtims, in vî bokion, ki vicot bin mizèrâbmint.

On l' loumot l' Tibaut dou Blanc, mès on djot toudis l' Blanc, amon l' Blanc.

Dju n'dirans nin k' il astot fwârt malin; du ç'costé là, i li à mankot bramint, mès sa fame, lîe, s'île n'astot nin pus maline ku loû, astot bramint pu vicieuse.

Lu Blanc avot don in djayî (noyer) et tous les ans, i gn'avot nin pus d'djaves su l'âbe ku d'plumes su la keuwe d'in sorèt.

Et l' Blanc croyot toudis ku l'âbe li danrot des dja.yes. Mès, tous les ans, ç'ère parèy. In djou, il è dit à l'âbe:

- Si l'anée ki vint, dju n'ê pon d'djaves, dju t'fous djus. (Je t'abats).

Il astot djà bin 6-7 ans ki d'jot çà ou djayî, mès i n'avot nin pus d' djaves ène anée ku l' ôte.

Il è don pris la hache èt il è stôré l'djayî. Cand çut-ci è sté à l'valéye, avu l'pus bê dlé la pate, il è so.yî ène rolète, pis il è pris un boukèt dul pus grosse brantche , k'il è r'soyî ossi.

Il è tchèrdjî t't'à fwêt su la tchèrète, pîs il èst n'nalé amon l'tchèrpati d' Suni avu.

Arivé à Suni d' bon matin, il li è falu ratinde la djoûrnée, ca lu tchèrpati ère vòye et nu rintrot k'à l'basse vèsprée.

Cand l' Blanc l'è vu, i li è dit insi:

- Vlà d'pwis à matin ku dj' ratins après ti, dju vôros bin k' tu m' travayros l' bwès ku dj' t'ê amon.né.

(Duvant d'aler pu lon, dju dîrans ku l'Blanc cro.yot co às mås d'Sints.)

Il è don dit ou tchèrpatî k'i vlot in batche pou leu couchèt, pasku, jusk' à là, on li voudot s'bwâre su la pavéye du ran.

- Avu l'ptit bokèt, tu m'frès la statue d' Sint Tibaut, k'est m'patron et l' patron des cîs ki n'sont nin malâdes.

Et i s'è mètu à rëciter la prière à Sint Tibaut:

«Çu t'oume mwindje bin,

« I n' bwès nin mô

« Il è l' mô Sint Tibaut.

Çu ki vut dire: Çut'oume là est bin pwârtant.

-Dju vu z' awè sa statue s' la corniche, à l'mâjon.

-Pou c'maçî, dit-i l'tchèrpatî, dju n'ê nin les ustiyes k' i fât, et pis, dju n'ê jawmês pon fwêt du statues.

Mês, l' Blanc l'è tèlmint taliné (importuner) ku l'ôte s'è lèchî adîre.

Cand l'ovradje è sté fwête, lu tchèrpatî è outchî l' Blanc, pîs i li è moustré l' Sint. Çu n'astot nin dul fine buzougne. Il avot fwêt pou in mî.

Lu Sint s' ârot putot loumé Sint Tilêd ku Sint Tibaut. I li avot fwêt in manton coume ène galotche, il avot foré les oûys trop fond avu la turbîe, et pou l'rèsse, vât mî n'à nin câzer.

Cand l' Blanc è vu l' Sint, il è sté tout binâje, mågré ku l' Sint n'ère nin bê; il è payî l' Sunijot, il è tchèrdjî batch et statue su la tchèrète, pîs i nn'è ralé à L'forêt.

Ossitot rintré, il è vit'mint pwârté l' batch' ou couchet k' est sté tèlmint sbaré k'il è d'mèré deux djoûs sin mwindjî. Pîs, il è mètu la statue s' la tch'minée, pou k'ile pwâte chance às bièsses èt às djans dul mâjon.

Il avot justumint adon ène vatche ki n'alot nin fwârt; ile avot gonflé et ça n'su passot nin. Coumint, mu diréz v', ène vatche du Blanc è polu gonfler ? Eh bin, vlà !

Lu Blanc wârdot ses trwâs jiguetes à dulong dul vôle. Tou d'in côp, i gnè ène djon.ne djuni ki s'est mètu à bizer, et su l' timps k' i courot après, les deus ôtes s'ont mètu à bover (brouté sur le champ du voisin) dul djon.ne trêfe toute frèche du rouzée, tant et si bin ku yène a n' è gonflé. Lu Blanc l'è rintée ou stâle pou la sougnî; mès i n' è arivé à rin. Il è don outchî l'artisse k' è v'nu mète des aplâsses (emplâtres) à l' vatche.

Ç'ârot sté parèy du les mète su ène djambe du bwès, ça ârot fwêt ostant d' èfèt. Et les sous k'il è d'né à l'artisse, ç' ârot sté l'min.me du les foute à l' rivîre.

Cand l'artisse è sté r'vôle, la vatche s'est mètu à baver, ile avot les d'bouts frèds. Sutinduwe su s' n' ancine, ile runakot su t'tafwêt, lu fûr et min.me lu wayin. Lu Blanc la carèssot, tout cacame. Il li est don v'nu l'idée du dire ène prière à Sint Thibaut, pou k'i chape la bièsse. I s' dijot ku l' Sint avot fwêt des mirakes pu grands k'ça.

Il è don sté s'mète à dgn'nos dvant l' Sint à li d'jant :

-Grand Sint Tibaut, z' astèz m' patron, si vous vlèz, vous plèz guèri ma vatche; dju sés bin ku dju v' z' è promis du fwêre brûler ène boujie à l' èglije; dju l' frê cand dj'ârê l'timps; c'est ça ki m'è manké jusk' asteur ; à n' atindant, dju v'z'è fwêt fwêre ène bèle statue avu la brantche du nosse djayî. Grand Sint Thibaut, frère ou batch' du nosse couchèt, guèrichèz ma vatche èt dju...

Là d'sus, la fame rinture èt li crîe :

-Inutile du continuwer! Ta vatche èst crèvéye.

D'in sât, lu Blanc è sté su pîds. La colêre li è monté conte Sint Tibaut ; i criyot:
- Avu tes lêds oûys et t'manton à galotche, co in côp, frère ou batch' du nosse couchèt, tu n'ès jamwês rin valu vèrt, tu vâs co mwinsse sètch.

Pîs la radje è pris ou Blanc, k' è apougnî la statue; il è monté ou gurnî èt il è fôré l' Sint dins ène drète batrèle, la tiêsse en bas.

-Dju t'avos promis ène boujie pou t'lumer, mês ç'côp-ci, tu nn' ârès jamwês pon! Djus sans kites!

Gaston Lucy.

R'mètu à nû pa Louwis Bédjot, lu 27 du Mèy 1996.